



**NOGOMETNI/FUDBALSKI SAVEZ
BOSNE I HERCEGOVINE**

PROPozICIJE
za takmičenje BH Telecom Premijer lige BiH
u takmičarskoj sezoni 2013/2014.

Sarajevo, Juni/ Lipanj 2013.

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor NS/FS BiH, na sjednici održanoj u Sarajevu 25.06.2013. godine, donosi s l i j e d e ć e

PROPOZICIJE

za takmičenje BH Telecom Premijer liga BiH u takmičarskoj sezoni 2013/2014.

OPŠTE ODREDBE

Član 1.

Ovim Propozicijama utvrđuje se način organizovanja i provođenja takmičenja BH Telecom Premijer lige BiH u takmičarskoj 2013/2014 godini.

UČESNICI TAKMIČENJA

Član 2.

Premijer liga BiH broji 16 klubova i to:

- prvih 14 klubova BH Telecom Premijer lige BiH prema plasmanu na kraju takmičarske 2012/2013 godine;
- prvoplasirana ekipa Prve lige NS Federacije BiH na kraju takmičarske 2012/2013 godine;
- prvoplasirana ekipa Prve lige FS Republike Srpske na kraju takmičarske 2012/2013 godine.

Na kraju takmičarske 2013/2014 godine iz BH Telecom Premijer lige BiH ispadaju dva najslabije plasirana kluba.

USLOVI ZA UČESTVOVANJE U TAKMIČENJU

Član 3.

Za učestvovanje u takmičenju BH Telecom Premijer lige BiH klubovi su obavezni ispunjavati uslove iz Pravilnika o licenciranju klubova BH Telecom Premijer lige BiH.

ORGANIZACIJA TAKMIČENJA

Član 4.

Takmičenjem u BH Telecom Premijer ligi BiH rukovodi Izvršni odbor NS/FS BiH, putem Komiteta za takmičenje NS/FS BiH.

Član 5.

Takmičenje u BH Telecom Premijer ligi BiH provodi se po dvostrukom bod – sistemu, a prema kalendaru takmičenja, koji donosi Izvršni odbor NS/FS BiH.

Raspored utakmica određuje se žrijebom, uz mogućnost dirigovanog žrijeba za klubove iz istog mjesta.

Žrijebanje vrši Komitet za takmičenje NS/FS BiH.

Član 6.

Nakon obavljenog žrijeba, klubovi su obavezni u roku od 10 dana da dostave u Odjel za takmičenje:

- naziv stadiona na kome će igrati utakmice;
- mjesto i vrijeme odigravanja utakmica (subota-nedelja);
- spisak igrača sa brojevima na dresu koje će nositi tokom naredne sezone (bitno za COMET sistem), boju opreme (gaćice, majica i dokoljenice) i rezervnu boju sa kojom će klub nastupati.

Član 7.

Utakmice se igraju u dva dijela po 45 minuta. Odmor između dva dijela igre traje minimalno 10 maksimalno 15 minuta.

Član 8.

Tri posljednja prvenstvena kola igraju se istog dana i u isto vrijeme.

PROMJENA TERMINA ODIGRAVANJA UTAKMICA

Član 9.

Promjena termina odigravanja utakmice može se vršiti na osnovu podnesenog pismenog zahtjeva zainteresovanog kluba, koji mora biti podnesen Komitetu za takmičenje NS/FS BiH, najkasnije 8 (osam) dana prije utvrđenog termina odigravanja utakmice, a koji u sebi sadrži razlog zbog kojeg se traži promjena termina s predloženom dokumentacijom, iz koje se može utvrditi opravdanost zahtjeva, kao i eventualni prijedlog za novi termin.

U slučaju kada zahtjev za promjenu termina nije podnesen sukladno stavu 1. ovog članka, odnosno najmanje na 3 (tri) dana prije utvrđenog termina za odigravanje utakmice, uz pismeni zahtjev potrebno je dostaviti i pismenu saglasnost drugog kluba utakmice, za koju se traži promjena termina.

Odluku o zahtjevu kluba za promjenu termina utakmice iz stavka 1. i 2. ovog člana donosi Komitet za takmičenje NS/FS BiH, s tim da se kod donošenja odluke moraju imati u vidu odredbe člana 19. i 20. Pravilnika o nogometnim takmičenjima BiH.

Odluka Komiteta za takmičenje NS/FS BiH je konačna i ona se dostavlja zainteresiranim klubovima i ostalim sudionicima takmičenja.

DUŽNOSTI KLUBOVA

Član 10.

Klub domaćin je obavezan pripremiti teren za igru, a odluku o podobnosti terena za odigravanje utakmice donosi isključivo sudija utakmice.

Klub domaćin je obavezan osigurati odigravanje utakmice sa loptama koje će putem sponzorskog ugovora obezbjediti i odobriti NS/FS BiH.

Član 11.

Klub je obavezan na stadion doći 90 minuta prije utakmice i nastupiti sa najboljim sastavom.

Član 12.

Takmičenje se administrativno vodi kroz COMET informacijski sistem. Klub domaćin obavezan je da delegatu utakmice stavi na raspolaganje računar sa priključkom na internet, kao i da prije početka utakmice a najkasnije 60 minuta, obavezno dostavi delegatu na propisanom obrascu spisak igrača i službenih lica koja će nastupati na utakmici. Spisak mora biti ovjeren i potpisan od zvaničnog predstavnika kluba. Spisak prijavljenih igrača mora sadržavati podatke 18 igrača prijavljenih u Comet sistemu.

Član 13.

Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti klupske, entitetske zastave, zastave županija/kantona, zastava fair playa.

Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije po članu 52. Disciplinskog pravilnika NS/FS BiH.

Član 14.

Klub domaćin će, na zahtjev gostujućeg kluba, a prema mogućnostima, izvršiti rezervaciju smještaja i ishrane, kao i starati se o njihovom dočeku, boravku i ispraćaju.

Sve troškove iz prethodnog stava snosi gostujuća ekipa, ako drugačije nije predviđeno posebnim sporazumom klubova.

Član 15.

Klub domaćin je obavezan da poduzme sve mjere u cilju osiguranja ličnosti: članova gostujuće ekipe, sudaca, kontrolora suđenja, delegata, gostujućih navijača (kod organiziranog dolaska) za vrijeme odigravanja utakmice, nakon završetka utakmice sve do napuštanja stadiona i mjesta odigravanja utakmice, kao i poduzet sve mjere na stadionu za odigravanje utakmice, predviđene Pravilnikom o sigurnosti na međunarodnim utakmicama i utakmicama saveznog stepena takmičenja NS/FS BiH.

Klub domaćin, također je obavezan osigurati odgovarajuću dežurnu redarsku službu s propisno označenim dovoljnim brojem redara ili zaštitarske organizacije, pripadnike policije, liječnika i dežurno sanitetsko vozilo sa osobljem i nosilima, kao i dovoljan broj skupljača lopti koji moraju biti propisno obilježeni.

Klub domaćin je obavezan nadležnoj policijskoj upravi prijaviti mjesto i vrijeme odigravanja utakmice i pribaviti pismeno odobrenje, a na zahtjev policijske uprave dostaviti i druge relevantne podatke.

Bez pripadnika policije, sanitetskog vozila, dežurne liječničke službe, vatrogasaca i redarske službe utakmica se neće igrati.

Klub-organizator dužan je obezbijediti na stadionu jednu kontrolnu sobu, koja osigurava sveobuhvatan pogled na unutrašnjost stadiona.

Ova kontrolna soba služi za hitno okupljanje: delegata, sudije, voditelja osiguranja, kontrolora-člana komisije za bezbjednost, predstavnika policije, u slučaju krizne situacije.

Član 16.

Klub domaćin obavezan je neovisnoj snimateljskoj kompaniji, koju ovlasti NS/FS BiH, omogućiti adekvatne uvjete za snimanje utakmice s najmanje 3 (tri) kamere, jedna na sredini terena a dvije bočne u visini kaznenog prostora.

Također, TV kompaniji koja vrši direktni prijenos utakmice, osigurati punu sigurnost za opremu i djelatnike, za vrijeme i nakon završetka utakmice, u objektu stadiona.

Član 17.

Za vrijeme odigravanja prvenstvenih utakmica u stadionu, pored terena za igru, u tehničkom prostoru mogu se nalaziti lica akreditovana od strane NS/FS BiH i koja ispunjavaju kriterije u postupku licenciranja za takmičenje u BH Telecom Premijer ligu BiH:

1. predstavnik kluba;
2. šef Stručnog štaba-trener;
3. dva pomoćna trenera;
4. igrači u sportskoj opremi;
5. ljekar kluba;
6. fizioterapeut.

Predstavnik kluba, šef Stručnog štaba ili pomoćni trener ne mogu biti ista osoba.

Navedena lica obavezna su posjedovati odgovarajuću licencu koju izdaje NS/FS BiH za tekuću takmičarsku sezonu.

Validnost izdatih potrebnih dokumenata mogu kontrolisati samo subjekti koji su ih i izdali, a delegat na utakmici utvrđuje njihovo posjedovanje, odnosno identitet predstavnika kluba.

Osobe čiji se identitet ne može utvrditi ne mogu se nalaziti u tehničkom prostoru, osim zamjenskih igrača za koje važe odredbe člana 23. Propozicija takmičenja.

Član 18.

Za vrijeme odigravanja utakmica bez prisustva gledalaca, pored osoba iz člana 15, 16. i 17. ovih Propozicija, mogu biti prisutni članovi uprava klubova, akreditovani novinari i fotoreporter, osobe iz administracije kluba-domaćina i dječaci-dodavači lopti.

Članovi uprava klubova i osobe iz administracije kluba-domaćina obavezni su boraviti u VIP loži.

NAJMANJI BROJ IGRAČA U IGRI

Član 19.

Utakmica ne može da počne ako jedana od ekipa nema najmanje sedam igrača.

Igrači koji nisu upisani do početka utakmice u zapisnik sa utakmice ne mogu nastupiti na utakmici.

Ako jedna ekipa za vrijeme igre ostane sa manje od sedam igrača, sudija je dužan da zaustavi igru, a ako u roku od pet minuta klub ne nastupi s minimalnim brojem igrača, sudija je dužan da označi kraj utakmice.

Član 20.

Svaka ekipa prijavljuje u zapisnik sa utakmice 18 igrača.

U igri učestvuje 11 prijavljenih igrača, a tokom igre mogu se izvršiti tri zamjene. Predstavnici klubova dostavljaju delegatu sastav ekipa 60 minuta prije početka utakmice.

Član 21.

Ekipe na jednoj utakmici ne mogu igrati u istim ili sličnim bojama dresova. U protivnom, dresove će promijeniti domaća (prvoimenovana) ekipa.

PRAVO NASTUPA IGRAČA

Član 22.

Na prvenstvenim utakmicama mogu nastupiti igrači koji su stekli pravo igranja prema odredbama Pravilnika o registraciji, statusu i transferu igrača NS/FS BIH, ukoliko su navršili 17 godina života, kao i igrači koji su navršili 16 godina, ali sa obaveznim specijalističkim ljekarskim pregledom, kojim se oglašava sposobnim za nastupanje na utakmicama seniorskog uzrasta.

U sastavu prijavljene ekipe (18 igrača) moraju se nalaziti najmanje tri igrača mlađa od 21 godine života.

Za takmičarsku 2013/2014. godinu, kao igrači mlađi od 21. godine života smatraju se igrači rođeni 01. 01. 1992. godine i mlađi.

Pravo nastupa igrača stranih državljana regulisano je odredbama Pravilnika o registraciji, statusu i transferu igrača NS/FS BiH. Klub može imati više registrovanih igrača stranih državljana, s tim što 6 (šest) igrača stranih državljana mogu biti upisani u zapisnik sa utakmice i imaju pravo nastupa na jednoj utakmici.

Igrači sa dvojnim državljanstvom ne smatraju se stranim državljanima.

IDENTITET IGRAČA

Član 23.

Na prvenstvenim utakmicama mogu nastupiti samo igrači čiji je identitet utvrđen putem sportske legitimacije izdate od nadležnog organa za registraciju, a u slučaju njenog nedostatka identitet će se utvrditi na osnovu javne isprave: lične karte ili pasoša.

Ukoliko se identitet igrača utvrđuje na osnovu javne isprave, klub je obavezan na zahtjev Komiteta za takmičenje NS/FS BiH dostaviti u NS/FS BiH sportsku legitimaciju u roku od 24 sata.

Identitet se u pravilu utvrđuje prije početka utakmice.

Za igrače koji su zakasnili na početak utakmice, odnosno na početak drugog dijela, a upisani su u zapisnik sa utakmice, identitet se utvrđuje za vrijeme odmora između dva dijela igre i neposredno po završetku utakmice.

Član 24.

Svaki igrač mora imati sportsku legitimaciju sa upisanim datumom i ovjerenim ljekarskim pregledom ili, izuzetno, zvaničnu ljekarsku potvrdu o izvršenom ljekarskom pregledu.

Ljekarski pregled važi šest mjeseci, a za igrače mlađe od 17 godina četiri mjeseca.

Igrač koji nije upisan u zapisnik sa utakmice, ili koji nije izvršio ljekarski pregled, ne može nastupati na prvenstvenim utakmicama.

DELEGAT NA UTAKMICI

Član 25.

Delegata utakmice određuje Komitet za takmičenje NS/FS BiH, sa usvojene liste delegata za sezonu 2013/2014.

Ukoliko na utakmicu ne dođe delegirani delegat, njegovu dužnost preuzima posmatrač suđenja na toj utakmici.

Delegat zastupa Komitet za takmičenje i ima vrhovni nadzor na utakmici.

Nakon određivanja, delegat dobija nalog mailom od Sekretarijata saveza u čijem sadržaju mora biti navedeno mjesto, vrijeme i satnica odigravanja utakmice.

Delegat na utakmici je obavezan odmah nakon odigrane utakmice unijeti sve podatke o utakmici (tj. Izvještaj sa utakmice) u COMET sistem sa kratkim opštim opisom dešavanja na utakmici, sa kojima upoznava sudiju utakmice, a nakon sravnjanja podataka svojom šifrom zaključuje utakmicu, a iste mora potvrditi i sudija utakmice svojom šifrom.

Delegat na utakmici je obavezan u roku od 24 sata po odigranoj utakmici melom poslati delegatski izvještaj, a u roku od 48 sati po odigranoj utakmici, preporučenom poštom, Odjelu za takmičenje, dostaviti Izvještaj delegata sa ovjerenim spiskovima igrača i snimak video kasete sa odigrane utakmice.

Komitet za takmičenje NS/FS BiH donosi posebno Upustvo o vršenju dužnosti delegata.

Ukoliko na utakmici dođe do incidenata, prekida utakmice, isključenja igrača, ili na zahtjev Komiteta za takmičenje NS/FS BiH, delegat i sudija su obavezan dostaviti dopunski izvještaj u roku od 24 sata po odigravanju utakmice.

Član 26.

Ako delegat na utakmici utvrdi da bilo koje službeno lice kluba (predstavnik, trener, ljekar, fizioterapeut) nema licencu NS/FS BIH i propisnu člansku legitimaciju, neće mu dozvoliti uzlazak u ograđeni dio terena za igru.

Član 27.

Delegat je obavezan da 90 minuta prije početka utakmice održi radni sastanak (brifing) sa predstavnicima klubova, sudijama utakmice, kontrolorom suđenja, komesarom za bezbjednost i predstavnikom policije.

POSMATRAČ SUĐENJA

Član 28.

Posmatrač suđenja određuje Komitet za sudije i suđenje, u skladu sa odlukom Izvršnog odbora NS/FS BIH.

Nakon određivanja, posmatrač suđenja dobija nalog elektronskim putem od Sekretarijata saveza u čijem sadržaju mora biti navedeno mjesto, vrijeme i satnica odigravanja utakmice.

Posmatrač suđenja daje brojčanu ocjenu suđenja u roku od 48 sati po završetku utakmice.

Posmatrač suđenja preuzima DVD video-zapis sa snimljene utakmice, te ima pravo i mogućnost sporne momente pogledati prije davanja ocjene u naznačenom roku.

Izveštaj o suđenju posmatrač suđenja sastavlja prema Uputstvu o ocjenjivanju suđenja, i to u sistemu COMET-a, u roku od 48 sati po odigranoj utakmici.

SUDIJE / SUCI

Član 29.

Utakmice BH Telecom Premijer lige BiH mogu voditi samo sudije sa liste sudija BH Telecom Premijer lige BiH, čije određivanje vrši Komitet za sudije i suđenje NS/FS BiH, u skladu sa odlukom Izvršnog odbora NS/FS BiH.

Izuzetno, suci sa liste neposredno nižeg stepena takmičenja (Prva liga NS F BiH i Prva liga FS RS) koji se nalaze u talent i mentor programu, mogu suditi utakmice BH Telecom Premijer lige BiH.

Na utakmicama BH Telecom Premijer lige BiH mogu se odrediti dodatni asistenti sudije/suci.

Član 30.

Nakon određivanja, sudija dobija nalog elektronskim putem Odjela za suđenje u čijem sadržaju mora biti navedeno mjesto, vrijeme i satnica odigravanja utakmice.

Član 31.

Sudija utakmice je dužan da prije početka utakmice pregleda i odluči da li je teren uslovan za igru. Ako sudija utvrdi u prisustvu dva kapitena ekipa da je teren neuslovan za igru, to konstatuje u zapisniku sa utakmice.

Sudija je dužan da nakon utakmice u svom izvještaju navede podatke koje se odnose na postignute pogotke, zamijenjene, opomenute i isključene igrače, a prema potrebi i druge podatke, ako se radi o prekidu utakmice, neredu, tuči, uključujući eventualne prijave i sl.

Za utakmice BH Telecom Premijer lige BiH određuje se i četvrti sudija.

ZAPISNIK SA UTAKMICE

Član 32.

Delegat sastavlja zapisnik sa utakmice u prisustvu sudije utakmice. Zapisnik sa utakmice se popunjava elektronski, u COMET sistemu. Klubovi su dužni prije početka utakmice dostaviti ovjeren i potpisan spisak igrača i službenika svoje ekipe na propisanom obrascu.

Po završetku utakmice, elektronski zapisnik ovjeravaju delegat svojom šifrom i sudija svojom šifrom.

REGISTRACIJA UTAKMICA

Član 33.

Ako na utakmici nije uložena žalba, a ne postoje uslovi za registraciju po službenoj dužnosti, utakmicu Komitet za takmičenje registruje postignutim rezultatom.

Ako je prvostepena odluka pravosnažna, ili je donijeta drugostepena odluka koja je konačna, jednom registrovana utakmica ne može biti poništena, izuzev u postupku zaštite zakonitosti Pravilnika o nogometnim/fudbalskim takmičenjima NS/FS BiH.

Komitet za takmičenja NS/FS BiH vrši registraciju odigranih utakmica najkasnije u roku od 14 dan od dana odigravanja tih utakmica.

Ako je uložena žalba, rok za registraciju utakmice se produžava do konačne odluke.

ŽALBE

Član 34.

Žalbe po svim osnovama moraju se elektronskim putem (telegramski/mailom/telefaxom) koji ima automatski ispis, datum i vrijeme o najavi žalbe dostaviti u NS/FS BiH u roku od 24 sata po odigranoj utakmici, a pismeno obrazloženje sa dokazom o uplaćenju taksi ima se dostaviti NS/FS BiH u roku od 48 sati po odigranoj utakmici.

Ukoliko rok za ulaganje žalbe ističe u nedjelju ili na državni praznik, rok za ulaganje žalbe se produžava za prvi naredni radni dan.

Žalba se dostavlja Komitetu za takmičenje NS/FS BiH.

Uz žalbu se dostavlja dokaz o uplaćenju taksi u skladu sa odlukom IO NS/FS BiH.

Član 35.

Nenajavljene, neblagovremene i žalbe koje nisu uredno taksirane neće biti uzete u razmatranje.

Odluke po uložnim žalbama biti će donijete u roku od sedam dana od dana prijema žalbe.

Član 36.

Žalbe u prvom stepenu rješava Komitet za takmičenje NS/FS BiH.

Član 37.

Žalba na prvostepenu odluku može se podnijeti Apelacionoj komisiji NS/FS BiH, u roku od tri dana od dana prijema odluke prvostepenog organa, u skladu sa odlukom IO NS/FS BiH Drugostepena odluka mora biti donijeta u roku od 15 dana od dana prijema žalbe.

Drugostepena odluka je konačna u .

Član 38.

U interesu regularnosti takmičenja, organ koji donosi odluke može utvrditi i skraćeni žalbeni postupak.

DISCIPLINSKE SANKCIJE

Član 39.

O disciplinskim prekršajima klubova, igrača, članova stručnog i tehničkog rukovodstva i funkcionera klubova i službenih lica na utakmici koji učestvuju u takmičenju, odlučuje se na osnovu Disciplinskog pravilnika NS/FS BiH.

Žalba na odluku prvostepenog organa se podnosi u roku od tri dana od prijema odluke, uz dokaz o uplaćenju taksi u skladu sa odlukom IO NS/FS BiH.

Drugostepeni organ će odluku donijeti u roku od 15 dana od dana prijema žalbe.

Drugostepene odluke po disciplinskim prekršajima su konačne.

U interesu regularnosti takmičenja nadležni organ može utvrditi i skraćeni žalbeni postupak.

UTVRĐIVANJE PLASMANA

Član 40.

Plasman klubova na tabeli utvrđuje se prema odredbama člana 43. Pravilnika o nogometnim/fudbalskim takmičenjima NS/FS BiH.

FINANSIJSKE ODREDBE

Član 41.

Prihodi sa prvenstvenih utakmica pripadaju klubu domaćinu.

Član 42.

Službenim licima na utakmici pripadaju odgovarajuće naknade (dnevnice, putni troškovi i takse), u skladu sa odlukom Izvršnog odbora NS/FS BiH.

Novcem sponzora BH Telecom Premijer lige BiH Savez isplaćuje troškove službenim licima, putem tekućih računa, najkasnije u roku od 48 sati po odigranoj utakmici.

Član 43.

Shodno odluci Izvršnog odbora NS/FS BiH, klubovi su u sezoni 2013/2014. godine, oslobođeni uplate kotizacije za učešće u takmičenju, s tim što su obavezni postupiti u skladu sa ugovorom između NS/FS BiH i BHT1 o prenosu po jedne utakmice u svakom kolu.

NAGRADE

Član 44.

Nogometni/Fudbalski savez BiH prvoplasiranoj ekipi BH Telecom Premijer lige BiH dodjeljuje prelazni pehar i pehar u trajno vlasništvo.

Igračima, tehničkom i stručnom rukovodstvu prvoplasiranog kluba dodjeljuje se 35 zlatnih medalja.

Član 45.

Za osvojeno prvo mjesto u Fair-Play-u klubu pripada pehar.

ZAVRŠNE ODREDBE

Član 46.

Sastavni dio ovih Propozicija čini i Uputstvo o posjedovanju minimalne medicinske opreme na utakmicama BH Telecom Premijer lige BiH.

Član 47.

Za sve što nije predviđeno ovim Propozicijama, važe odredbe Pravilnika o nogometnim/fudbalskim takmičenjima NS/FS BiH, Pravila nogometne/fudbalske igre i drugih propisa NS/FS BiH, FIFA-e i UEFA-e.

Član 48.

Propozicije stupaju na snagu danom donošenja, a primjenjuju se za takmičarsku sezonu 2013/2014.

PREDSJEDNIK

Elvedin Begić s.r.